

12593



ՀԱՍՏԱՏՈՒՄ ԵՄ՝
Շրջակա միջավայրի նախարար



Համբարձում Մաթևոսյան

« 10 » 11 2025թ.

ՊԵՏԱԿԱՆ ՓՈՐՁԱՔՆՆԱԿԱՆ ԵԶՐԱԿԱՑՈՒԹՅՈՒՆ

ՇՐՋԱԿԱ ՄԻՋԱՎԱՅՐԻ ՎՐԱ ԱԶԴԵՑՈՒԹՅԱՆ ՓՈՐՁԱՔՆՆՈՒԹՅԱՆ

ԲՓ № 262 - 25

Նախաձեռնող՝

Երևանի քաղաքապետարան
ք. Երևան, Արգիշտի 1

Գործունեությունը՝

Իսակով-Արշակունյաց ճանապարհային
հանգույցի կառուցում
ք. Երևան

Առդիր՝ 10 թերթ

ՊԵՏԱԿԱՆ ՓՈՐՁԱՔՆՆԱԿԱՆ ԵԶՐԱԿԱՑՈՒԹՅՈՒՆ
ՇՐՋԱԿԱ ՄԻՋԱՎԱՅՐԻ ՎՐԱ ԱԶԴԵՑՈՒԹՅԱՆ ՓՈՐՁԱՔՆՆՈՒԹՅԱՆ

ԲՓ № 262 - 25

« 10 » 11 2025թ.

Իսակով-Արշակունյաց ճանապարհային հանգույցի կառուցման շրջակա միջավայրի վրա ազդեցության գնահատման հաշվետվություն

Նախաձեռնող՝	Երևանի քաղաքապետարան
Ներկայացված նյութեր՝	Շրջակա միջավայրի վրա ազդեցության գնահատման հաշվետվություն, նախագծային փաստաթուղթ /Ա կատեգորիա/
Գտնվելու վայրը՝	Երևան քաղաքի Կենտրոն, Շենգավիթ, Մալաթիա Սեբաստիա վարչական շրջաններ

Ներածական մաս. Երևանի քաղաքապետարանը նախատեսում է Իսակով-Արշակունյաց ճանապարհային հանգույցի կառուցում Երևան քաղաքի վարչական տարածքում: Ճանապարհի ծրագծի հիմնական մասը՝ (մոտ 1.2 կմ), անցնում է Կենտրոն վարչական շրջանով, մյուս հատվածը՝ (մոտ 0.7 կմ), անցնում է Շենգավիթ վարչական շրջանով, փոքր հատվածը՝ (մոտ 761մ), գտնվում է Մալաթիա Սեբաստիա վարչական շրջանում:

Նախատեսվող գործունեությունը հանդիսանում է Ա կատեգորիայի գործունեության տեսակ՝ համաձայն «Շրջակա միջավայրի վրա ազդեցության գնահատման և փորձաքննության մասին» օրենքի 12-րդ հոդվածի 3-րդ մասի 10-րդ կետի «գ» ենթակետի:

Իսակով-Արշակունյաց ճանապարհային հանգույցի իրականացումը ֆինանսավորվում է Ասիական զարգացման բանկի (ԱԶԲ) Բազմափուլային ֆինանսավորման գործիքի (ԲՖԳ) միջոցով՝ քաղաքային կայուն զարգացման ներդրումային ծրագրի (ՔԿԶՆԾ) շրջանակներում:

Նախատեսվող ծրագիրը մշակվել է կայուն, ինտեգրված և տնտեսապես արդյունավետ քաղաքային տրանսպորտի համակարգի ստեղծմանը խթանելու նպատակով, հետևաբար ուղղված է բարելավելու քաղաքային տրանսպորտի համակարգը Երևանում: Նախագծի իրականացումը կնպաստի երթևեկության, տրանսպորտի բարելավմանը, Երևանի կենտրոնի բեռնաթափմանը նոր հուսալի և արդյունավետ շրջանցիկ ճանապարհի կառուցման միջոցով:

Կառուցվող ճանապարհի ծրագիծը հիմնականում անցնելու է պետական, համայնքային, որոշ հատվածում մասնավոր սեփականության հողերով, որոնց նպատակային և գործառնական նշանակությունները բնակավայրերի, բնակելի կառուցապատման, բնօրինակ ոգտագործման,



հասարակական և խառը կառուցապատման, գյուղատնտեսական՝ պտղատու այգիներ, արդյունաբերության, ընդերքօգտագործման և այլ արտադրական նշանակության՝ արդյունաբերական օբյեկտների և անտառային են:

Նկարագրական մաս. Իսակով-Արշակունյաց ճանապարհային հանգույցի կառուցումը կապելու է Իսակովի և Արշակունյաց պողոտաները: Արշակունյացի հատվածը գտնվում է Շենգավիթ վարչական շրջանում: Այս հատվածը կսկսվի Արշակունյաց պողոտայից և կշարունակվի մոտ 170 մ, կհասնի Հրազդան գետի կամրջին: Հրազդան գետի կամրջի հատվածը կսկսվի ՊԿ 0+170-ից և կավարտվի ՊԿ 0+440-ում: Կամրջի երկարությունը կլինի մոտ 270 մ:

Իսակովի հատվածը գտնվում է Կենտրոն՝ մասամբ Մալաթիա-Սեբաստիա վարչական շրջանում: Ծրագիրը ներկայացված է մոտավորապես 6.6 կմ երկարությամբ, երկկողմանի երթևեկելի մասով, կենտրոնական բաժանիչ գոտիով և մայրերով, նոր ծրագծի (մոտ 2.0 կմ) վրա կառուցվող քաղաքային ճանապարհից և Հրազդան գետի վրայով անցնող կամրջի 28 մ երկարությամբ երկաթբետոնե հեծաններով: Ճանապարհը նախագծվում է որպես ներքաղաքային ճանապարհ/փողոց՝ 60 կմ/ժ առավելագույն արագությամբ:

Նախատեսված է, որ ճանապարհահատվածի հիմնական մասը կունենա 6 (3 x 2) երթևեկության գոտիներ, յուրաքանչյուրը՝ 3.30-3.75 մ լայնությամբ և 4.00 մ լայնությամբ կենտրոնական բաժանիչ գոտի: Այնուամենայնիվ, որոշ հատվածներում այն ենթակա է որոշ փոփոխության: Ավարտված ճանապարհի մակարդակը կարող է հասնել գոյություն ունեցող մակարդակից մինչև 12.6 մ բարձր, միջինում բարձրությունը կլինի մինչև 1 մ:

Ծրագիրը ներառում է հետևյալ բաղադրիչները.

-Իսակովի պողոտայի հանգույց՝ գոյություն ունեցող Իսակովի պողոտայի հանգույցը նախատեսվում է մասնակի ձևափոխել, դարձնելով երեքնուկի տերևի տեսքով,

-Արշակունյաց պողոտայի հանգույց՝ օվալաձև հանգույց, որը կկապի Իսակով – Արշակունյաց ճանապարհային հատվածը և Արշակունյաց պողոտան, կկառուցվի ստորգետնյա անցում՝ Արշակունյաց պողոտայի երթևեկության հոսքերի համար,


-Նորագյուղ թաղամասի հանգույց – նախատեսված է Էջմիածնի հին խճուղին և Իսակով Արշակունյաց ճանապարհային հատվածը զրոյական մակարդակում միմյանց կապելու համար, հիմնական ճանապարհի համար կկառուցվի երկաթբետոնե թռիչքային կառուցվածք՝ վրայով անցնելու համար, իսկ Էջմիածնի հին խճուղին Իսակովի պողոտային կմիանա թռիչքային կառուցվածքի տակով:

-Նախագիծը ներառում է նաև 500 մմ տրամագծով նոր կոյուղատար, 27 նոր անձրևահորերի կառուցում և հետիոտնային ուղեանց՝ Արշակունյաց պողոտայում:

Նոր ճանապարհի ծրագիծը կկառուցվի այնպիսի ստանդարտներով, որոնք թույլ կտան ունենալ բարելավված ճանապարհային գծանշումով, ազդանշանային համակարգով, անվտանգությամբ, ջրահեռացման համակարգով, ջրթող խողովակներով և կողնակներով ճանապարհ:

Ծրագրի կառուցվածքային տարրերը նախագծվել են հաշվի առնելով տարածաշրջանի սեյսմիկ ակտիվության բարձր ռիսկայնությունը: Նախագծային լուծումներում հաշվի են առնվել նաև ջրահեռացման կազմակերպման հարցերը՝ ջրի հոսքերը վերահսկելու, հողերի ողողաքայքայումը և տեղանքում հեղեղումները նվազագույնի հասցնելու համար:

Ծրագիրը տեղակայված է չոր և կիսաչոր տարածքում (Իսակովի կողմից մոտ 1.2 կմ), ուստի նախագիծը ներառում է կանաչապատում ճանապարհի բաժանիչ գոտում և կողնակների



երկայնքով (ծառերի տնկում, ճիմապատում), ինչը կբարելավի օդի որակը ճանապարհի օտարման գոտում և մերձակա տարածքներում: Ակնկալվում է, որ տեղանքում օդի որակը կբարելավվի նաև երթևեկության խցանումների նվազման պատճառով: Ճանապարհի օտարման գոտու երկայնքով նախատեսվում է նոր կոյուղատարի իրականացում՝ հաշվի առնվելով ապագա ընդլայնված քաղաքին ծառայելու դրա հնարավորությունները:

Ճանապարհի նոր ծրագիծը պահանջում է Կոմիտասի անվան զբոսայգու՝ անմիջապես օտարման գոտում գտնվող պատերի, մետաղական ցանկապատերի և սյուների մի մասի ապամոնտաժում: Ապամոնտաժված ցանկապատը կրկին 187 մ երկարությամբ և 2,5 մ բարձրությամբ վերաշարվելու է իր նախկին տեսքով՝ համաձայն 901.30 տեխնիկական մասնագրի պահանջների:

Շինարարական աշխատանքները տիպիկ են ճանապարհների և կամուրջների կառուցման նախագծերի համար և ընդհանուր առմամբ հետևյալն են.

- գոյություն ունեցող շինությունների ապամոնտաժում,
- հանույթի/հողային աշխատանքներ,
- լիցքի իրականացում,
- Հրազդան գետի վրայով մոտ 270 մ երկարությամբ նոր կամրջի կառուցում,
- երեքնուկի տերևի տեսքով հանգույց/ օվալաձև հանգույց/ ուղեանցներ /մոտեցման իջատեղեր,
- հաղորդողիների տեղահանում՝ ներառյալ բարձրավոլտ էլեկտրահաղորդման գծերը,
- ասֆալտե ծածկի իրականացում,
- ջրահեռացման համակարգի կառուցում,
- արտաքին լուսավորություն,
- ճանապարհային նշանների տեղադրում, գծանշում, պաստառներ և արգելափակոցներ,
- կանաչապատում՝ ներառյալ ոռոգման համակարգը,
- աղմկապաշտպան պատնեշների կառուցում:

Ճանապարհների կառուցման շինարարական աշխատանքների համար օգտագործվող նյութերն են.

- լիցքի նյութ՝ կոպիճ և ավազ, հողային և ժայռային հանույթ,
- բետոն,
- ասֆալտ,
- մետաղական ամրաններ կառուցվածքների համար,
- մետաղական կառուցվածքներ և կցամասեր,
- ջուր՝ տեխնոլոգիական (տոփանում) և բնապահպանական (փոշու առաջացումը կանխարգելելու համար) նպատակներով,
- այլ (խողովակներ, լուսավորություն, պաստառներ և պողպատե արգելափակոցներ, ներկեր, քսանյութեր և այլն):

Շինարարական բոլոր նյութերը ձեռք են բերվելու պաշտոնապես գրանցված մատակարար կազմակերպություններից:

Ծրագիրը նախատեսում է մեծ ծավալով հողային աշխատանքների իրականացում, քարքարոտ վերին հողաշերտի մաքրում, բուսաշերտի առանձնացում, հողային հանույթ և տեղափոխում: Հողային աշխատանք սկսելուց առաջ հողի վերին բերրի շերտը /ծավալը գնահատվում է մոտ 11100 մ³/ հանվելու է և պահպանվելու է ՀՀ օրենսդրությամբ պահանջվող նորմերին համապատասխան:



Ժամանակավոր կուտակումն իրականացվելու է ծրագրի օտարման գոտում կամ քաղաքապետարանի, վարչական շրջանի, մասնավոր սեփականատիրոջ հետ համաձայնեցված տարածքներում՝ բացառելով բուսահողի որևէ կորուստ և հետագայում օգտագործվելու է իրականացվելիք կանաչապատման աշխատանքների համար:

Նախագծի համաձայն շինարարության համար անհրաժեշտ է լինելու 44678.07 մ³ խիճ և 13365.39 մ³ կոպճավազային խառնուրդ: Լիցքի համար անհրաժեշտ քարերը, կոպիճը, ավազը և այլ նյութեր (լիցքի աշխատանքների ընդհանուր ծավալը գնահատվում է 125781.73 մ³), ինչպես նաև ասֆալտը և բետոնը գնվելու են պայմանագրային հիմունքներով՝ գրանցված հանքերից և գործարաններից:

Փոշենստեցման համար անհրաժեշտ տեխնիկական ջուրը շինհրապարակ նախատեսվում է բերել ավտոցիստերներով, որի բերման աղբյուրը հետագայում կհստակեցվի շինարարության կապալառուի կողմից:

Ճանապարհամերձ հատվածների բարեկարգման նպատակով նախագծում նախատեսվում է իրականացնել կանաչապատման հետևյալ աշխատանքները.

- ծառերի տնկում՝ 765 հատ,
- թփերի տնկում՝ 67 հատ,
- կանաչապատման համար ոռոգման համակարգ՝ ներառյալ պլաստիկ խողովակները, պոմպերը, փականները և միացումները, ինչպես նաև էլեկտրական հաղորդալարերի միացումները պոմպին/շարժիչին՝ անկախ պահանջվող երկարությունից- 20,465.00 գծ մ,
- կենտրոնական բաժանիչ գոտու և ծածկի եզրերում հողային պաստառի ջրահեռացում 4,000.00 գծ մ, ծածկից մինչև 1 մ խորության վրա $dn=150$ մմ ծակոտկեն խողովակի տեղադրում,
- ավազային անկողնակ,
- ցամաքուղային հետլիցք,
- ինժեների կողմից հաստատված տեսակի գետտեքստիլի (GOST 33068) տեղադրում,
- դիտահորերի տեղադրում (լրակազմ, 100 մ հեռավորությամբ),
- անհրաժեշտ բոլոր կցամասերի, միացումների և այլ մասերի տեղադրում,
- Ճմապատում՝ 24088.00 մ²
- հողի բերրի շերտով ծածկում և սերմի ցանքս՝ 23452.00 մ², որի համար կպահանջվի 11726 մ³ բուսահող:

Նախատեսվող կանաչապատման աշխատանքների համար անհրաժեշտ բուսահողի ձեռքբերումը, տեղափոխումն ու օգտագործումը կիրականացվի ՀՀ գործող օրենսդրության պահանջներին համապատասխան՝ նախապես համաձայնեցնելով տեղական ինքնակառավարման մարմինների հետ:

Ոռոգման ցանցերի նախագիծը մշակված է ըստ պատվիրատուի (ԵՔ) առաջադրանքի, ճանապարհաշինական գծագրերի և գեոդեզիական հանույթի՝ համապատասխան գործող նորմերի: Ջրի պահանջվող քանակն ընդունված է.

- 1մ² սիզամարգի համար՝ 5լ/օր,
- 1մ² սիզամարգ ծառատունկով՝ 10լ/օր:

Ոռոգումը նախատեսված է Արշակունյաց պողոտայի և նախագծվող ճանապարհի խաչմերուկների ՊԿ 0+00 - ՊԿ2+40 հատվածներում (մինչև էստակադա), որը կիրականացվի Փ50 պոլիէթիլենային խողովակով: Ոռոգման աղբյուր է հանդիսանում գոյություն ունեցող քաղաքային ոռոգման ցանցը՝ ЭЦБ6-4-10-Q=1.4 լ/վրկ H=40 մ պարամետրերով պոմպով



(համաձայնեցված է ԵԲ «Կանաչապատում և շրջակա միջավայրի պահպանություն» ՀՈԱԿ-ի հետ:

Ոռոգման ենթակա մյուս հատվածը ՊԿ 4+91.66-ից մինչև Իսակով-Մոնթե Մենքոնյան հանգույցն է: Այս հատվածն ընդգրկում է փողոցի 4 մ լայնությամբ և 1368 մ երկարությամբ բաժանարար գոտին, որտեղ նախատեսվում է ծառատունկ՝ փողոցի երկայնքով, շեպերի վրա, Իսակով-Մոնթե Մենքոնյան խաչմերուկի (հանգույցի) հարակից տարածքներում: Առավելագույն ծախսը այս հատվածում կազմում է 54,73 մ³/օր: Բաժանարար հատվածի ոռոգումը նախատեսված է ջրման ծորակներով, իսկ շեպերը և մնացած տարածքները՝ անձրևիչներով:

Տվյալ հատվածի սնման աղբյուր է հանդիսանում մոտ 120 մ հեռավորության վրա գտնվող քաղաքային ոռոգման ցանցը: Նախատեսվում է տեղադրել նոր պոմպ /CR64-2-2A-F-A-E HQ QE/ Q=16լ/վրկ, H=30 մ, N=7 կվտ Grundfos մոդելի, որը կմոնտաժվի գոյություն ունեցող պոմպակայանում: Նախատեսվում է տեղադրել պոլիէթիլենային $\Phi 160-\Phi 40$ մմ խողովակներ 0,4 ից 0,5 մ խորության վրա: Ոռոգման համակարգի հետագա շահագործման ժամանակ ոռոգման պարբերականությունը և տևողությունը կկարգավորվի բոլոր ճյուղերի վրա նախատեսված փականներով:

Կառուցված ճանապարհի շահագործման ընթացքում հնարավոր բարձր աղմուկը մեղմացնելու համար կառուցվելու են աղմկապաշտպան 4 պատնեշներ, որոնց տեղադիրքը որոշվում է աղմուկի մոդելավորման հետազոտության հիման վրա:

Շինարարական աշխատանքների ընթացքում առաջացած թափոնները կարող են ընդգրկել.

- շինարարության համար ոչ պիտանի հող և ժայռային նյութ,
- շինարարական թափոններ՝ մետաղ, պլաստիկ, փայտի կտորներ, բետոնե ապամոնտաժված մասեր և այլն,
- հին ճանապարհային ծածկի հեռացումից առաջացած ասֆալտի թափոններ,
- հեղուկ թափոններ՝ բետոնաջրի, յուղերի, վառելանյութերի, քսայուղերի մնացորդներ,
- կենցաղային թափոններ:

Շինարարության համար ոչ պիտանի նյութերը տեղափոխվելու են Երևանի քաղաքապետարանի կողմից հատկացված վայր:

Նախագծման փուլում միջազգային մասնագետի կողմից 2021թ.-ի հունվարի 18-ից մինչև հունվարի 19 իրականացվել են աղմուկի և թրթռումների ակուստիկ հետազոտություն՝ ծրագրային տարածքի աղմուկի մակարդակի ֆոնային (ելակետային) տվյալները հավաքագրելու և ճանապարհի ակուստիկ ազդեցությունը մոդելավորելու նպատակով: Հետազոտության ընթացքում աղմուկը չափվել է ծրագծի երկայնքով 3 կետերում: Արդյունքները համեմատվել են և ելակետային իրավիճակում բնակելի հատվածում (կետեր NM1 և NM 3) աղմուկը չի գերազանցում սահմանված ստանդարտներին: Սակայն Արշակունյաց պողոտային մոտ գտնվող NM2 կետում գերազանցում է արձանագրվել: Քանի որ մոդելավորման արդյունքներով սպասում է գերազանցում աղմկապաշտպան պատնեշների կառուցման անհրաժեշտություն է առաջանում: Նախագծով նախատեսվում է ակուստիկ պատնեշների կառուցում, ինչն նվազացնելու է աղմուկի մակարդակը: Աղմկապաշտպան պատնեշ տեղադրելու նպատակը աղուկն առնվազն 30 դԲ(A)-ով նվազեցնելն է:

Թրթռումների առողջության ստանդարտներն /սանիտարական նորմը/ ապահովելու համար ԲԿՊ-ում նախատեսվում է թրթռումների արագացման մակարդակի գործիքային չափագրումների պահանջ ինչպես շինարարության, այնպես էլ թեղույունների վերացման ժամանակահատվածի համար: Այս միջոցառումները պետք է իրականացվեն հապախողի

կողմից: Կապալառուն պետք է իրականացնի իր սեփական չափագրումները շինարարական աշխատանքները սկսելուց առնվազն 21 օր առաջ: Կապալառուն պատասխանատու կլինի իրականացնելու գործիքային կանոնավոր չափագրումներ (ամսական երկու անգամ, ինչպես նաև բողոքների առկայության դեպքում):

Թրթռումների մակարդակի ուժգնությունը չափագրումներն իրականացվելու են 6 կետերում՝ ծրագրի մոտակայքում գտնվող բնակելի տան մոտ: Կատարված չափագրումների տվյալների հիման վրա մոդելավորման միջոցով որոշվել են դրանց հնարավոր ազդեցությունները շինարարական աշխատանքների ընթացքում շենք շինությունների վրա: Առաջարկվել են միջոցառումներ, որոնք ընդգրկվել են ԲԿՊ համապատասխան բաժիններում:

Ծրագրի տարածքում մակերևութային ջրային մարմիններն են Հրազդան գետը և ստորին Հրազդանի ոռոգման ջրանցքը: Իսակով - Արշակունյաց ճանապարհային հանգույցի առաջարկվող ծրագրի համար ՇՄԱԳ շրջանակում նախկինում իրականացվել է հետազոտություն՝ ջրի որակի ֆոնային վիճակն արձանագրելու համար: Նմուշառումը կատարվել է 2 կետում՝ մեկը գետից, մյուսը ոռոգման ջրանցքից՝ ֆոնային վիճակը որոշելու համար: Յուրաքանչյուր ջրային մարմնից մեկ նմուշառման կետը համարվել է բավարար, քանի որ կամրջի սկզբի և վերջի կետերի միջև դեպի նշված ջրային օբյեկտները ներհոսքի աղբյուրներ չկան: Շինարարության հետ կապված ազդեցությունը որոշելու համար Կապալառուն պարտավորված է լինելու իրականացնել կանոնավոր նմուշառում և չափումներ ընդհանուր առմամբ 4 կետում՝ 2-ը Հրազդան գետից և 2-ը ոռոգման ջրանցքից՝ կամրջի աշխատանքների իրականացման վայրից 50 մ հոսանքն ի վեր և 50 մ հոսանքն ի վար:

Գետի ձախ ափի մեջտեղում առկա է բաց ջրատար, որի պատերը հիմնականում վնասված են: Նույն ջրատարը ծառայում է որպես կոյուղի՝ լանջին խիտ կառուցված տների համար: Խողովակներից արտահոսքը, տեղումները, ձնհալքը, ջրահեռացման համակարգի բացակայությունը մեծապես նպաստում են ստորերկրյա ջրերի մակարդակի բարձրացմանը: Ազդեցությունն այստեղ ավելի հավանական է և աղտոտումը նվազագույնի հասցնելու մեղմացման միջոցառումները նախատեսված են: Մակերևութային և ստորգետնյա ջրերի պաշտպանության պլանում:

Հնարավոր է վառելանյութի, յուղի (հիդրավլիկ, փոխանցման տուփ, շարժիչ և այլն) քսանյութերի և այլ հեղուկ նյութերի և թափոնների արտահոսք կամ հոսակորուստ: Նման կարգի աղտոտումը կառավարելի է և ԲԿՊ-ով նախատեսված են մեղմացնող միջոցառումներ, այդ թվում. գործող տեխնիկայի տեղում սպասարկման դեպքում՝ վառելանյութի ճիշտ և անվտանգ պահեստավորում, տեխնիկական սպասարկման համար հատուկ մեկուսացված տարածքների հատկացում թույլատրված վայրերում, բաց անպաշտպան գրունտի վրա տեխսպասարկման աշխատանքների բացառում, ցանկացած արտահոսքի մաքրում:

Ծրագրի շինարարական աշխատանքների հետևանքով հողային ռեսուրսների վրա ազդեցությունը գնահատվում է աննշան: Թեև շինարարական աշխատանքների փուլում, ինչպես նաև ճանապարհի հետագա շահագործման ընթացքում վառելիքի, յուղի (հիդրավլիկ, փոխանցման տուփ, շարժիչ և այլն) քսայուղերի և այլ հեղուկ նյութերի արտահոսքով հողի աղտոտման որոշակի վտանգ կա, այնուամենայնիվ ազդեցության խստությունը գնահատվում է ցածր, քանի որ նախատեսված են անհրաժեշտ միջոցառումները՝ ուղղված հնարավոր ազդեցությունների նվազմանը/կանխմանը: Այնուամենայնիվ, շինարարական աշխատանքների ընթացքում հողի հնարավոր աղտոտումը կանխելու համար կանոնավոր մեղմացնող միջոցառումներ են նախատեսվում ԲԿՊ-ում:



Ուսումնասիրության արդյունքում պարզվել է, որ ծրագրի ազդեցության տարածքում ՀՀ կառավարության 14.08.2008 թ.-ի «ՀՀ բնության հուշարձանների ցանկը հաստատելու մասին» N967-Ն որոշմամբ գրանցված բնության հուշարձաններ առկա չեն:

Շինարարական աշխատանքների ընթացքում վնասակար նյութերի արտանետումներն առաջանալու են հանույթի, բեռնման աշխատանքների, ծածկի իրականացման, գծանշումների և սարքավորումների շահագործման հետևանքով: Շինարարական տեխնիկան նույնպես աղմուկի և թրթռումների առաջացման հիմնական աղբյուր է: Շինարարության ընթացքում շրջակա միջավայրի վրա կանխատեսվող արտանետումների ազդեցությունը գնահատելու համար իրականացվել է օդի որակի մոդելավորում՝ օգտագործելով հատուկ «էռա» ծրագիրը: Շինարարության ընթացքում օդի որակի պարամետրերին համապատասխանությունն ապահովելու համար ԲԿՊ-ում փոշու, ծծմբի երկօքսիդի (SO₂) և ազոտի երկօքսիդի (NO₂) արտանետումների պարբերական գործիքային չափագրումների պահանջ է նախատեսված ինչպես շինարարության, այնպես էլ թերությունների վերացման ժամանակահատվածում: Ծծմբի երկօքսիդի (SO₂) և ազոտի երկօքսիդի (NO₂) չափագրումները կիրականացվեն կապալառուի կողմից երկու անգամ՝ առաջին անգամ նախքան շինարարական աշխատանքները սկսելը (21 օր առաջ), երկրորդ անգամ՝ մինչև թերությունների վերացման ժամանակահատվածի ավարտը: Շինարարության ընթացքում լրացուցիչ միջանկյալ չափագրումներ կիրականացվեն տեղի բնակիչների կողմից գրանցված բողոքների դեպքում:

Կապալառուն պատասխանատու կլինի իրականացնելու փոշու՝ 2.5 PM և 10 PM մասնիկների գործիքային կանոնավոր չափագրումներ (ամսական երկու անգամ, նաև ԱՄ-ներից բողոքներ ստանալու դեպքում) և արդյունքների ու դրանց վերլուծությունների վերաբերյալ ներկայացնել հաշվետվություններ՝ համեմատելով դրանք ՀՀ օրենսդրությամբ սահմանված կարգավորումների և ՄՖԿ (IFC) ստնադարտների հետ՝ ըստ PM2.5-ի և PM10-ի հետևյալ առավելագույն թույլատրելի կոնցենտրացիաների:

Փոշու չափագրումներն իրականացվելու են 3 ընտրված կետերում, աշխատանքային ժամերի ընթացքում, յուրաքանչյուր կետում առնվազն 3 անգամ, որի հիման վրա որոշվելու է միջին ցուցանիշը: Կետերն ընտրվելու են խիտ բնակեցված տարածքներում՝ մոտ գտնվող զգայուն ընկալիչների սկզբունքի հիման վրա: Չափիչ սարքը տեղադրվելու է մոնիթորինգի պլանում որոշված զգայուն ընկալիչների մոտ (շենքից դուրս)՝ վերջիններիս վրա ազդեցությունը որոշելու համար:

Նախագծով ընդհանուր առմամբ կանաչապատվելու է 47540 մ² տարածքը, որից նախատեսված է 24088 մ² ճիմապատել, իսկ մնացած 23452 մ² ծածկել բուսահողաշերտով:

Ծրագրի շրջանակներում նախատեսվող շինարարական աշխատանքները կունենան ժամանակավոր բացասական ազդեցություններ շրջակա միջավայրի վրա, որոնք տիպիկ են փոքր և միջին չափի ճանապարհների կառուցման համար: Ակնկալվում է, որ շինարարական աշխատանքների բացասական ազդեցությունը կլինի ժամանակավոր և կկրի տեղային բնույթ, այսինքն՝ կսահմանափակվի շինարարական աշխատանքների իրականացման ժամանակահատվածով և շինհրապարակներով:

ՇՄԱԳ ընթացքում ուսումնասիրվել են ծրագրի ազդեցությունները և իրականացվել է մեղմացնող միջոցառումների և դրանց մոնիթորինգի պլանավորումը ԲԿՊ-ում ըստ ծրագրի զարգացման փուլերի: Մոնիթորինգ իրականացվելու է ինչպես շինարարական աշխատանքների փուլում, այնպես էլ հետշինարարական փուլում՝ թերությունների վերացման ժամանակաշրջանում:



Ծրագրի շրջանակներում իրականացվել է շրջակա միջավայրի հնարավոր տնտեսական վնասի, ինչպես նաև հատվող ծառերի/ թփերի հատման հետևանքով բնությանը հասցվող վնասի գնահատում: Համաձայն հաշվարկի՝ շինարարական աշխատանքների արդյունքում շրջակա միջավայրի որակին հասցված տնտեսական վնասը կկազմի 208 283 938 ՀՀ դրամ, իսկ հատվող ծառերի/ թփերի վնասը՝ 6 296 000 ՀՀ դրամ: Վնասի փոխհատուցումը հատուցման վճարների տեսքով իրականացվելու է օրենքով սահմանված կարգով, ինչպես նաև վնասի փոխհատուցման միջոցառումների տեսքով:

Պատճառաբանական մաս. Օրենսդրությամբ սահմանված կարգով՝ փորձաքննության գործընթացում Երևան քաղաքի Շենգավիթ վարչական շրջանի ղեկավարի նստավայրում անցկացված հանրային լսման ընթացքում նախատեսվող գործունեության իրականացումը տեղական ինքնակառավարման մարմնի և հանրային լսման մասնակիցների կողմից արժանացել է հավանության:

Փորձաքննական գործընթացին մասնակցել են շրջակա միջավայրի նախարարության ստորաբաժանումները, առողջապահության, ներքին գործերի, կրթության, գիտության, մշակույթի և սպորտի նախարարությունները, քաղաքաշինության կոմիտեները, ինչպես նաև Երևանի քաղաքապետարանը:

Ստացված դիտողությունները և առաջարկությունները հաշվի են առնվել հաշվետվության լրամշակված տարբերակում:

Ամփոփելով հաշվետվության բնապահպանական և սոցիալական ազդեցությունների վերլուծությունները՝ կարելի է եզրահանգել, որ շրջակա միջավայրի վրա հնարավոր բացասական ազդեցությունները, որոնք կառաջանան նախատեսվող գործունեության աշխատանքների իրականացման արդյունքում, կկրեն ժամանակավոր և տեղայնացված բնույթ և կլինեն թույլատրելի նորմերի սահմաններում: Դրանք կարող են բացառվել կամ մեղմվել գործունեության ընթացքում բնապահպանական միջոցառումների արդյունավետ իրականացմամբ:

Փորձաքննական պահանջներ

1. Մինչև գործունեության իրականացումն անհրաժեշտ է ՀՀ օրենսդրությամբ սահմանված կարգով, ստանալ համապատասխան համաձայնությունները և թույլտվությունները /ներառյալ ջրօգտագործումը, ջրահեռացումը, հողերի գործառնական նշանակության փոփոխությունը, գոյություն ունեցող ենթակառուցվածքների տեղափոխումը, թափոնների, այդ թվում ասֆալտի, հեռացումը, վերամշակումը, տեղափոխումը և այլն/:
2. Գործունեության իրականացման ընթացքում անհրաժեշտ է ղեկավարվել առողջապահության նախարարի 2012 թ. սեպտեմբերի 19-ի № 15-Ն և 2002 թվականի մարտի 6-ի № 138 հրամաններով հաստատված սանիտարական կանոնների և նորմերի պահանջներով:
3. Գործունեությունն իրականացնելիս անհրաժեշտ է առաջնորդվել՝ «Կենդանական աշխարհի մասին» ՀՀ օրենքի /2000թ./, «Բուսական աշխարհի մասին» ՀՀ /1999թ./ օրենքի պահանջներով, ինչպես նաև՝ ՀՀ կառավարության՝ 14.08.2008թ. № 967-Ն 31.07.2014թ. № 781-Ն, 29.01.2010թ. «ՀՀ Բուսերի և կենդանիների Կարմիր գիրքը հաստատելու մասին» № 71-Ն և № 72-Ն որոշումների պահանջներով:
4. Համաձայն ՀՀ կառավարության 2002 թվականի ապրիլի 20-ի N 438 որոշման 43-րդ կետի՝ «Հիմնարկները, իրավաբանական և ֆիզիկական անձինք աշխատանքների կատարման ժամանակ պատմական, գիտական, գեղարվեստական և այլ մշակութային արժեք ունեցող



հնագիտական և մյուս օբյեկտների հայտնաբերման պահից պարտավոր են դադարեցնել աշխատանքները և դրա մասին անհապաղ հայտնել լիազորված մարմնին»

5. Ճանապարհի ազդեցության գոտում գտնվող՝ Կոմիտասի անվան զբոսայգու մետաղական ցանկապատերի, սյուների ապամոնտաժման և վերաշարման աշխատանքներն անհրաժեշտ է իրականացնել ՀՀ մշակույթի նախարարության գործառույթների և ընթացակարգերին համապատասխան:

6. Շինարարական հրապարակների տեղադրման, հողաբուսաշերտի ժամանակավոր պահեստավորման, հանվող գրունտի և շինարարական աղբի հեռացման տարածքները և վայրերը իրականացնել Երևանի քաղաքապետարանի և վարչական շրջանի ղեկավարների հետ համաձայնեցված:

7. Անհրաժեշտ է մշակել Կանաչապատման, բարեկարգման և արդիականացման նախագիծ՝ համաձայնեցնելով Երևանի քաղաքապետարանի հետ: Ծառատնկման աշխատանքներն անհրաժեշտ է իրականացնել «Կանաչապատում և շրջակա միջավայրի պահպանության» ՀՈԱԿ-ի մասնագետների հետ համաձայնեցված /պահպանելով 3-5 տարի խնամքի և կաչողականության ապահովման միջոցառումներ/:

8. Շինարարության ընթացքում անհրաժեշտ է ապահովել ԲԿՊ-ում և բնապահպանական մոնիթորինգի պլանում առաջարկվող միջոցառումների և մոնիթորինգային դիտարկումների իրականացումը և ժամանակացույցերը, որոնց արդյունքները պետք է հասանելի լինեն պետական շահագրգիռ մարմիններին և հանրությանը:

ԵԶՐԱՓԱԿԻՉ ՄԱՍ

Իսակով-Արշակունյաց ճանապարհային հանգույցի կառուցման շրջակա միջավայրի վրա ազդեցության գնահատման հաշվետվությանը տրվում է պետական փորձաքննական դրական եզրակացություն՝ վերը նշված փորձաքննական պահանջների պարտադիր կատարման պայմանով:

«Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրենի պարտականությունները կատարող՝



Շերիքնազ Մկրտչյան

«Շրջակա միջավայրի վրա ազդեցության փորձաքննական կենտրոն» ՊՈԱԿ-ի գլխավոր մասնագետ՝ Ի. Մեջլիս Մեսրոպյան